



MUSTÉR/GLION

L'egliada dil catschadur pils detagls dalla natira

HANS HUONDER/FMR

Ilis proxims treis meins expona Ignaz Jacomet da Mustér/Peisel ses maletgs dalla fauna e flora ella claustra dominicana a Glion. Els dattan investa ella gronda varietad dalla natira, mo muossan era l'egliada dil catschadur pils detagls.

Ignaz Jacomet (64) malegiava bugen da buob, mo il temps suandont ha quell'activitad lu buca pli occupau el entochen avon rond 20 onns. «Da far ora lenna hai jeu giu in accident culla detta. Vid ir cun skis eis ei buca stau da patertgar», seregorda el. Enten far uorden en ina camoda ein cartas cun fotografias d'animals vegni enta maun ad el: «Zaco han quels maletgs fascinau mei ed jeu hai entschiet a malegiar quels sujets.» Ilis emprems onns ei quei succediu cun rispli, pli tard ha el fatg emprovas cun ieli e dapi dus onns malegia el cun acril.

Il detagl fascinescha

Ignaz Jacomet che ha giu empriu oriundamein da pictur e ch'ei staus engaschus pli che treis decennis tiegl Uffeci da construcziun bassa dil cantun Grischun avon ch'ir en pensiun avon rond in onn, ei fascinaus surtut dil detagl: «Jeu malegiel giu da fotografias, mo emprovel da metter ils sujets en in'acziun en in connex culla natira. Igl ei aschidadir ina cumbinaziun dil sujet malegiu cun in contuorn ch'jeu vesel empau auter.» Il plascher vid quell'occupaziun ch'ei daventada ils davos onns era empau pissiun, ha el surtut pervia dalla lavur vid il detagl: «A mi plai ei da sefatschentar da piculezzas ch'ei da constatar ella natira.» In sguard sin ses maletgs a casa a Peisel, leu nua ch'el ei era carschius si, muossa ch'el ei in amitg dalla natira e ch'el sa che fauna e flora ein plein facettas. Quellas segnan ils maletgs dil petgalenn, dil capricorn ni il tgau dil cavriel. «Igl ei buca adina sempel da dar la dretga mimica ad in animal, pertgei sco catschadur ves'ins numerusas expressiuns singularas.» La fauna e flora fascineschien el: «Jeu malegel bugen enzatgei real. Igl abstract ei buca mia caussa.»

Occupaziun surtut igl unviern

Ella claustra dominicana a Glion muossa el dall'entschatta november 2022 entochen il schaner 2023 ina part da sias lavurs, il mument ein quei rond 40 maletgs. Igl ei l'emprem'expo-



En siu dacasa a Peisel a Mustér lavura Ignaz Jacomet vid ses maletgs cun sujets dalla fauna e flora.

FOTOS HANS HUONDER



Maletgs dalla selvaschina denter entginas bialas trofeas da catscha.

siziun per Ignaz Jacomet che va a catscha dapi passa 40 onns: «Dus ga hai jeu mussau mes maletgs all'exposiziun cumineivla cun auters artists ella casa da scola a Segnas. Quei cheu ei veramein l'emprega cun lavurs spirontamein da mei.» Malegiar ei si'occupaziun oravontut duront igl unviern: «Culs dis ein bruts ei quei ina bellezi'activitad.» Duront quei temps malegi el savens; bia ni pauc bunamein mintga di. Ina ga ni l'autra ha gi el era fatg maletgs sin giavisch, per exempel per in natalezi. Cun in tschuppel da ses maletgs ha Ignaz Jacomet era gia creau calenders. Aschia ei era quel pigl onn 2023 semtgau e promts per la vendita.